



Terenga 4: Hōtaka 46 - Te Reo ā-Tuhi

He Mihi

Tēnā tātou kua rangitāmirohia nei e te reo kāmehameha. Koinei te marae o Ako e wātea ana ki te hea, ki te makiu, ki te ngare, hei papakāinga mō Ngākaunui, mō Ārita, mō Whakakoha. Mehe ko koe tēnā, nau mai ki tō tātou marae.

Hei Mahi Whakarongo

Ko Paraone Gloyne te kaikōrero o te rā nei. Māna te reo ā-tuhi e whakatairanga. I a koutou e whakarongo ana ki ana kupu whakatonu, tēnā whakaarohia ēnei pātai:

- 1) He aha ngā āhuetanga o tana mita?
- 2) He aha ngā ingoa o ētehi kārāwarawa, he aha hoki ngā mahi?
- 3) E rua ngā whakamahinga rerekē o te 'ā' i roto i ana whakamārama. He aha te rerekē o tētehi i tētehi?

He Whakamārama

He rerekē te reo ā-waha me te reo ā-tuhi. Anei ētehi o ngā hapa e hōrapa ana i roto i ngā tuhinga a te hunga e ako ana i te reo Māori:

Ki au > Ki a au (*E tika ana te 'Ki au' i te reo o Whanganui me Taranaki)

Hoatu kia Mea > Hoatu ki a Mea

Te Whanganui-ā-Tara > Te Whanganui-a-Tara

Ngā tuākana o Pētera > Ngā tuākana o Pētera.

Kai whakaako > Kaiwhakaako

E kīa nei > E kīia nei

Ki ētehi, kāore he take o te tohutō. Ko te mate o tērā whakaaro, he rerekē te tikanga o ētehi kupu mena ka tōia te oro puare. Anei ētehi tauira:

marama = *month* mārama = *clear, understand, bright*

kahu = *clothes* kāhu = *hawk*

tatari = *to wait* tātari = *to analyse*

māku = *I will...* mākū = *wet*

Hei Mahi

Whakaurua ngā kārāwarawa, whakatikahia hoki te āhua o te tuhinga nei:

Kitekoretatouewhakamahiingakarawarawataeatukingatohutoheuuauatewhaimaramatangaitekororokaw haiaetenuingaongaiwitotohutoheitohuitetongaotekupukotainuikapuruaiteropuareheitowhakahuatan gaotekupuahakoatohutoahakoapuruakotemeanuiekiteaanairototituhingangawahangaongakupumeto kiamaramaaitetangatakitetikangaotekorero.

Whakautu:

Ki te kore tātou e whakamahi i ngā kārāwarawa, tae atu ki ngā tohutō, he uaua te whai māramatanga i te kōrero. Ka whāia e te nuinga o ngā iwi te tohutō hei tohu i te tōnga o te kupu. Ko Tainui ka pūrua i te oro puare hei tō i te whakahuatanga o te kupu. Ahakoa tohutō, ahakoa pūrua, ko te mea nui, e kitea ana i roto i te tuhinga ngā wāhanga o ngā kupu me tō kia mārama ai te tangata ki te tikanga o te kōrero.